



Ref: MinOWD/A-3795/20

CARTA PUBLICO NA TUR MAESTRA Y MAESTRO/22 DI MAART 2020

Den tur mi bishitanan na nos scolnan na Aruba mi a topa alumnonan y maestronan cu kier un cambio den enseñansa. E mesun mensahe aki mi a hanja di hopi mayornan. E crisis sin precedente aki ta e oportunidad pa boso demostra cu maestro y maestranan ta e gran instrumentonan di cambio na Aruba. Bosonan por demostra di ta e mentenan briyante cu nos Pais mester na e momento aki. Bosonan por demostra di tin e curazonnan mas grandi cla pa yuda nos muchanan sali victorioso. Mi no tin duda cu nos muchanan ta den e miho mannan cu ta boso man. Ideal ta pa tur maestro por conecta/comunica di un forma digital y asina cada scol por organisa educacion digital pa nos muchanan cu ta na cas.

For di 23 di maart no ta un periodo di vakantie, a pesar cu tur scol ta sera pa un periodo. Ma pidi cada scol bin cu un plan di educacion na distancia. Nos muchanan tin cu sobrebibi den siglo 21 cu ta un era digital. Aruba afortunadamente ta un di e paisnan cu un poblacion cu mas halto acceso na internet den nos region. E gran mayoria di maestro tin un computer, tur material educativo ta accesibel pa un maestro y e gran mayoria di mayor tin un celular pa comunica cu scol. Casi tur ciudadano ta activo riba facebook. Duna educacion via un plataforma digital lo no mester ta un problema.

Pero asina mes cada maestro lo por haci un sondeo bao di su studiantenan pa establece ken tin y ken no tin acceso na internet via di nan cas. A base di e sondeo aki por tin un bista di cua alumno lo tin dificultad pa sigui instruccion y hasi ehersicionan via plataforma digital. E maestro por bin cu solucion creativo pa e alumnonan aki. Telearuba ta trahando riba un School TV.

Den e caso di e estudiante cu no tin acceso na internet y material digital por hasi lo siguiente:

- Enseñansa primario: den e caso cu e alumno no ta dispone di e material/methodo na cas e maestro lo por traha un paquete di material cu por inclui instruccion, weekplan di ehersicio. Mayornan por bin busca e pakete akin a scol y hibanan cas;
- Enseñansa secundario: alumnonan ta dispone di (mayoria) metodo na cas, docente lo por traha un studiewijzer/print material y organisa pa e alumno of su representante pasa busca esaki na scol, teniendo na cuenta tur precaucion.

Den e caso cu e mayor of alumno tin pregunta nan lo por aserca e maestro via plataformanan/formanan cu e maestro/scol ta pone disponibel pa e comunicacion. Niun maestro ta sin herment den 2020. Tin tur clase di material digital existente via websites y alavez videonan di instruccion existente. Tambe tin cierto material digital disponibel riba ea.aw/catalogo/. Esaki por facilita e docente den su preparacion pa e pakete di material, sea digital of den hard copy.

Pa nos kandidatonan pa eindexamen nos ta hasi un excepcion, Schoolexamens ta bai dor y mi tin confianza cu nos maestronan ta suficiente creativo pa yuda nos hobennan caba nan scol. E carta di Inspectie a indica e precaucionnan cu mester tuma na cuenta di DVG. Mi no tin duda cu nos maestronan lo busca solucionnan pa cumpli cu e indicacionnan aki usando e sentido comun.

No ta Aruba so ta enfrenta e reto aki, pero full mundo. Bishita e website di UNESCO y lo bo mira cu den 2020 tur pais ya conose un of mas tipo di educacion na distancia. Den e era digital aki, no child can be left behind.


Dr. Armando Rudy Lampe, Minister di Educacion, Ciencia y Desaroyo Sostenibel

